



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 8 Yangia anidakangma : f Tir Yimyim i tir_yimyim

tir yimyim TAPAK 7

Cummins 2026 IPL tetenzüklen asaya kar masayatetsü

Israel-i maneni Lebanon amak; nisung 20 tepsetogo



VOL. XXIII ISSUE NO. 155 (ADOK 155) DIMAPUR YANGTEPNÜ (THURSDAY) METSÜREMI (MARCH) 19, 2026 ₹ 5.00

ULLAS programme ajanga taintem angazüker

Dimapur, March 18, 2026 (TYO): Nagaland nung Understanding Lifelong Learning for All in Society (ULLAS) maparen ajanga adult education kanga ajungketdar.

ULLAS dang New India Literacy Programme ta-a ajar aser iba ya Ministry of Education, Government of India ajanga inyaker.

Iba sentong ajanga arishi küm 15 ser temapur shirnok azüngtsü-zülutsü memetet parnok nem foundational literacy aser numeracy sayutsü atema inyaker.

Nagaland nung iba sentong ya Directorate of School Education ajanga inyaker aser parnoki taintem nem basic education aser essential life skills sayur.

Census 2011 data nung ajemdaker district tenet- Mon, Kiphire, Phek, Zunheboto, Peren,

Tuensang aser Dimapur nung iba scheme inyaker. Iba asoshi Volunteer Teachers aser local coordinators ajanga tazüngertem anidener.

Tang tashi nung iba sentong kübok adult learners 18,018 tashi tenüng zülüoka lir aser Volunteer Teachers-i learning centres balala nung class agir. Talisa parnok asoshi class ya nikonngang teimba agir.

Iba sentong inyaka aruba aser adult learners-i angazükba asadangsü asoshi March 21, 2026 nü Foundational Literacy and Numeracy Assessment Test (FLNAT) agitsü.

FLNAT ya designated examination centres 860 nung agitsü aser takok angur nem National Institute of Open Schooling (NIOS) ajanga kulikaket agütsütsü.

Iran President-i Esmail Khatib khasetba jangjatsüogo

New Delhi, March 18, 2026 (Agencies): Bodbarnü Israel-i Intelligence minister Esmail Khatib tepsetogo ta Iran-i jangjatsüogo.

Iran President Masoud Pezeshkian-i mapa aitsü aser mangyimba metetdaksü.

"Kü den külemi inyaksemeritem- Ismail Khatib, Ali Larijani, aser Aziz Nasirzadeh nung den parnok kinungertem aser temeinterem tepsetba atema onoki mang ayimer" ta Pezeshkian-i ashi.

"Cabinet züngsem ana, Shura nung secretary, sepaitem aser Basij commanders tepsetba atema ni Iran nung den mangyimer. Parnoki taküm bendanga agütsüba ajanga asenok tali akangshitsü" ta Pezeshkian-isa ashi.

Tanü Israel defence minister Israel Katz-i yasung amakdang Khatib tepsetogo ta shia liasü.

Iran nung security tekolak Ali Larijani tepsetba sülen anogo ka lir Israeli sepaitemi Khatib den tongtipang tanishirtem tepsetogo.

"Israel sepaitem dang Iran nung tongti ketdangsürtem

tepsettsü tashi agütsüogo aser iba atema parnoki jelia temelaba meshitsü nungdak mali ta ni aser Prime Minister Benjamin Netanyahu nati shiogo" ta Katz-isa metetdaksü.

Esmail Khatib tepsetba ajanga anogo ana tsüngda Iran nung tongti tanishir tasembuba tepsetogo. Israel sepaitemi Basij commander Gholamreza Soleimani tepset. Basij ta asüba ya Islamic Revolutionary Guard Corps indang internal paramilitary force lir.

US-Israel-i Iran mezüng amakdang taoba Supreme Leader Ayatollah Ali Khamenei den külemi Iran defence minister Aziz Nasirzadeh tepsetogo.

Iba ya meinyakdang US State Department-i Iran Supreme Leader Mojtaba Khamenei aser tanga tongti ketdangsürtem indang osang sangoktsür nem \$10 million agütsütsü osang metetdaksü liasü.

Larijani tepsetba sülen Israeli PM Netanyahu-i television nung "Israel-i angati dang iba mapa inyakogo" ta ashi.

Nagaland Governor-i North East Youth Festival tenzüktsüogo



Chümoukedima Football Stadium nung Nagaland Governor Nand Kishore Yadav-i 9 buba North East Youth Festival 2026 lapokba sentong nung o jembiba angur.

Dimapur, March 18, 2026 (TYO): North east ya sempet aika aliba tesem ka lir aser lanurtemi shisaliok, saisapong, sobaliba, lokti tenzükba mesüra technology wadang ajak kokteta lir ta Nagaland Governor Nand Kishore Yadav-i ashi.

Bodbarnü Chümoukedima nung 9 buba North East Youth Festival 2026 lapokba sentong nung Governor Yadav-i o jembiba.

"India-i Viksit Bharat@2047 mangdang atema inyaka aodang lanurtem shilem kanga tongtipang lir. Tashi, asalentong aser sempettem ajanga purapiteter, tejakleni aoer aser renloker" ta pai ashi.

Lokti tenzükba mesüra langka tasen purapiteter ajanga North East tenüng ajungketer aser alimai meteta akümer. Lanur lenirtemi regional ambassadors

ama shilem agitsüla aser linük aser alima sabang nung pei pei state tem asoshi tajungtiba bener noktaksüla ta Governor Yadav-isa ashi.

Paisa benjung nung adenba lanurtem dang temulung ajak agi shilem agitsü, kati ka sobalioba akhümtsübuttsü, tebilembatem lemsateptsü aser taküm piyong atema medemer yimteptsü ayongzük.

"Iba benjung ajanga ajungmesotsü aser northeast o linük asoshi inyaksü angazükdak sabang ka südakjangma" ta Governor-isa metetdaksü.

Iba benjung ya "Ashtalakshmi: Celebrating Eight Forces of Youth and Progress" omen nung ajemdaker amunger aser iba ajanga North East nung lanurtem tashi, sempet aser tashi jangjadaksür, ta paisa shisem.

"Iba benjung ajanga asen lanurtemi parnok sempet sayutsü, tebilemba lemsateptsü, medemer yimteptsü aser tesentaktep akangshitsü maongka agütsür. Ibala sentong ajanga asenok kati ka ajungmesor aser külemi tarutsü tajung yangerteter" ta Youth Resources & Sports, Nagaland Advisor S. Keoshu Yimchunger-ia ashi.

"Linük nung sempet akaba aser sobaliba nung tera yanga aliba lanurtem rongnung North East lanurtem dena lir. Nenok indang sempet ajanga sayutetsü aser linük asoshi nenoki shilem agitsü maongka agütsütsü asoshi onoki inyaker" ta Ministry of Youth Affairs & Sports, Joint Secretary Shiv Ratan-i ashi.

Nagaland sorkari iba benjung amungtsü acha-ayangba atema pelar aser mapa tajung inyakba atema tenüngsang agütsür, ta Ratan-isa ashi.

North East Youth Festival 2026 ya Ministry of Youth Affairs and Sports, Government of India kübok Youth Resources and Sports Department, GoN-i ayongzük.

Iba benjungmung lapokba sentong nung Police Baptist Church, Chümoukedima Pastor Rev. A Temsu Longkumer-i temoatsü meshia sarasadem aser Arunachal Pradesh, Assam, Manipur, Meghalaya, Mizoram, Tripura, Sikkim o Nagaland parade contingents-i shilem agi.

Maneni, north eastern state ti nungi sobaliba shilem balala agi aser Nagaland Pencak Silat team ajanga martial art demonstration sayu.

ANARPTF-i membership fee agütsütsü mepishir

Dimapur, March 18, 2026 (TYO): All Nagaland Government Primary Teachers' Association (ANGPTA)-i Primary Teachers dang membership fee mesarutsü tuyuba atema All Nagaland Adhoc Regularised Primary Teachers' Forum (ANARPTF)-i telangzüba ka agütsüogo.

2014 nungi 2018 küm tetenzüklen tashi Nagaland nung primary tesayurtem ajak ANGPTA kübok dang liasü, saka December 17, 2017 nü ANGPTA lokti senden amendang mapa inyakba anogo nungi tenzük Primary Teachers' seniority list ka renemtsü lemteta liasü ta ANARPTF-i sangdong ka nung ashi.

Ajisüaka, ANGPTA nung direct regular ama shimokba

lennir kari mapa inyaksü tenzükba masü saka regularization asüba nung ajemdaker ang Primary Teachers' seniority list renemtsüla ta sangdong ka agütsü. Iba lemtet magizükba ANARPTF züngsemtemi June 2018 nung All Nagaland School Teachers' Association nung tanaben aden.

Külen, Department of School Education-ia June 13, 2026 nü Primary Teachers' seniority list meyipa repringshitsüla aser sorkar standing order ama renemtsüla ta tetuyuba ka agütsü. Ajisüaka, ANGPTA nung direct regular shimba Primary tesayur kari Primary tesayur 1,500 shi list ka agütsü saka Nagaland nung primary tesayur 8,000 nungi 10,000 shi lir ta ANARPTF-isa metetdaksü.

ANGPTA ketdangpurtemi tim mesüi aser ozüng alema inyakba ajanga All Nagaland Adhoc Regularised Primary Teachers' Forum ya ANSTA kübok dang lia arur kechiyong onoki 2018 nung ANGPTA den pila aser ANSTA nung aden, ta parnokisa ashi.

ANARPTF-i ANSTA nem membership fee tera agütsür anungji Adhoc Regularised Primary Teachers-i tera mesüra ashishitep kecha melii dang ANSTA nem nenok senti membership fee agütsütsü mepishir. Iba sen ya tesayurtem asoshi dang bendener ta ANARPTF Convenor T. Ezanthung Lotha, General Secretary Rhanthungo Kikon, Joint Secretary ana- Kiyasellie Mere o T. Langkong nungeri metetdaksüogo.



March 18, 2026 nü Nagaland Governor Nand Kishore Yadav-i Chümoukedima nung taoba Nagaland Chief Minister aser Goa, Maharashtra, Gujarat & Odisha Governor Dr. S. C. Jamir den ajurutepdang agiba noksa ka angur.

28 Koridang A/C bye-election atema ketdangsürtem renemshir



28 Koridang A/C nung Bye-election agitsü aliba mechi Deputy Commissioner, Mokokchung indang Conference Hall nung March 18, 2026 nü Election Expenditure Monitoring Team (EEM) senden ka amenba nung Expenditure Observer, D. Sreedhar Reddy-i jembidang tangokba noksa nung angur.

Dimapur, Metsüremi/March 18 (TYO): 28 Koridang A/C nung bye-election agitsü aliba mechi Mokokchung district nung Control Room ka amenokogo. Election dak sendakba osangtsüsang metetener temi 8787890205 aser 03692225015 nung tongteprateptsü mepishir, ta sangdong ka ajanga ashi.

Kasa mapang Office of the Chief Electoral Officer,

Nagaland nungi sangdong ka agütsüba nung, Home Guards aser Village Guards densema Nagaland Police nung Director General level nungi field nung aliba ketdangsürtem tashi election ketdangsür ama election mapang inyaksü, ta ashi.

Nüngja agütsüba ya Representation of the People Act, 1951 agi melaba ama inyak. Ibai inyakyim ya osang sangdongba anogo nungi bye-

election metembang tashi alitsü, ta ashi.

Iba mapang election dak sendakba duty nung aliba police personnel ajunga Election Commission indang deputation nung asütsü aser par tawabangba kübok inyaksangshitsü.

Parnoki election mapa inyaba mapang mapa nung tamakok ajurura Commission-i bentettsü, ta sangdong ajangasa ashi.

Nagaland nung village council shimba maparen tenzüker

Dimapur, Metsüremi/March 18 (TYO): Deputy Commissioner, Dimapur ajanga sangdong ka nung district kübok recognized village ajunga dang taruba kümsük (2026-2031) atema Village Council Members (VCMs) shimba maparen inyaksü totuyuba agütsüogo.

VCMs shimba yimya ya Nagaland Village and Tribal Councils Act, 1978 aser Nagaland Village and Area Councils Rules, 1979 nung aliba ama aser yimtsüng shia customary yimya nung asütsüla.

Ozüng agi melaba ama yimtsüng ajunga nung nübu shimtsüla aser VCMs tasen shimba proposed list ya Deputy Commissioner indang office nung April 15, 2026 tashinung agütsütsüla.

Tenüng agütsütsü asoshi

prescribed format nungya yimtsüng tenüng, yimtsüng nung senden amenba anogo aser shimba züngsemtem tenüng den parnok indang tejangja, meyongnem dener agütsütsüla.

Yimtsüng temi senden amenba, senden nung adener records den customary yimya aser özüng agi melaba ama him ta kuli süa Head GB nungi kulizüng kaket agütsütsüla, ta sangdong ajanga ashi.

Deputy Commissioner, Noklak, P Mono Khiamniungan-ia Noklak district kübok aliba yimtsüngtem nung 2026-2031 kümsük asoshi village council members tasen shimba metetdaksüogo.

VCMs tasen shimba maparen ya April 15, 2026 tashinung renemtsüla aser pei Area Administrative Officers ajanga

DC indang office nem mapang shidak nung agütsütsüla, ta ashi.

Deputy Commissioner, Tseminyu, Japheth Woch, NCS-ia Tseminyu district kübok recognized village nungi customary yimya amshia 2026-2031 kümsük asoshi VCMs shimtsü metetdaksüogo.

DC Tseminyu-isa Tseminyu District kübok Village Councils tem anentsü aser Village Council tasen meshim tashi Head GB-i Village Administration mapa inyaka alitsü ta metetdaksü.

Iba maparen ya April 25, 2026 tashinung renema sorkar nem agütsütsü. VCMs tasen shimba tenüngtem ya pei Area Administration Officer ajanga Deputy Commissioner, Tseminyu nem agütsütsüla, ta sangdong ajanga ashi.

District Hospital Wokha nung Blood Storage Unit semzük

Dimapur, Metsüremi/March 18 (TYO): Dr. Motsuo Memorial District Hospital (DMMDH), Wokha nung March 17, 2026 nü Blood Storage Unit ka semzüka district nung healthcare services tashi itshiba nung tongtipang alizüng ka tongogo.

Sentong akhumdong Deputy Commissioner Wokha, Vineet Kumar, IAS-i DMMDH Wokha nung tongtipang facility amenoktsü asoshi Medical Superintendent, DMMDH Wokha, Dr. Mhonchan N. Kithan aser par teloki meranga

inyakba atema tenüngsang agütsü laisü.

Paia district administration nungi maneni yariteptsü aser amalitep akatsü ta ashi aser azü tenla agütsüba nung shilem agitsü asoshi nüburtem aser talisa lanurtem ajungmesoa awareness agütsütsü tongtipang lir ta ashi.

Iba unit yagi shiranger anepaluba nung mozüki inyaksangshi tajungba akumtsü ta pai ashi.

Pathologist, Dr. Nzanthung Lotha-i azü tenla agütsüba ya kanga tongtipang lir aser iba

yagi nisung takum kumzükba kisüng masü saka temang aser tekolok shisatsü anema aliba nunga yarir ta ashi.

Pai Wokha nung aliba lanurtem dang mulungsoa arua azü tenla agütsütsü ayongzükla laisü.

Iba sentong nung Medical Superintendent, DMMDH Wokha, Dr. Mhonchan N. Kithan menden laisü. Iba Blood Storage Unit nungya azü unit 50 anogo 35 tashi yutettsü.

Unit tasenba asoshi mezüng tenla agütsü ya Zubemo Ngullie aser Chijanthung Tungoe laisü.



Bodhbarnü Chümoukedima nung 9th North East Youth Festival 2026 tenzükdang tangokba noksa ka nung Nagaland nungi shilem agirtem angur.

E&S Department-i Baal Aadhaar Registration Counter lapokogo

Dimapur, Metsüremi/March 18 (TYO): Arishi küm 0-5 tsünga tanur Child Enrolment Lite Client (CELC) kit ajanga Aadhaar Linked Birth Registration atema Baal Aadhaar Registration Counter ka Secretary, Economics & Statistics Department, Akunu S Meyase-i March 17, 2026 nü Directorate of Economics and Statistics, Kohima nung lapoktsüogo.

Arishi küm 0-5 tsünga tanur atema Aadhaar Linked Birth Registration ya ajanga tanur asodang register süa Aadhaar den link sütsütsü.

Tanur ka (0-5 age group) Aadhaar enrolment mapang biometrics magir aser arishi küm 5 aser 15 asüdag update asütsü nüngdaker.

Tanurtem national identity system nung kera registration asüba ajanga sorkar indang services aser welfare schemes nung parnok adentsü aser tanur asoshi sentong balala tajungba nung yanglua agütsüba nung yaritsü.

Department-i nüburtem dang Directorate nung aliba enrolment centre nung arua arishi küm 0-5 tsünga tanurtem Aadhaar Linked Birth Registration südaktsütsü ayongzükogo.

Iba facilities ya mapang tatsüka tsünga District Economics and Statistics Offices ajunga nung angutsü aser iba atema Unique Identification Authority of India (UIDAI) den nüngdakba maparen inyaktepba mapang lir.

Governor's Award atema nomination meshir

Dimapur, Metsüremi/March 18 (TYO): 2026 küm asoshi Arts, Music aser Literature nung Governor's Award atema nomination meshir, ta Deputy Commissioner, Kohima aser Chairman, Kohima District Level Committee, B. Henok Buchem, NCS-i sangdong ka nung metetdaksü.

Directorate of Art & Culture nungi shiti ka aruba nung ajemdaker iba sangdong ya agütsü.

Prescribed guidelines aser procedures nung aliba ama nominations ya agütsütsüla.

Personal Information Form kanga junga filled in asütsüla aser recommendation mesüra citation copy trok nung recommending authority indang meyingnem keter agütsütsüla.

Nüngdakba documents ajunga May 5, 2026 tashinung office tongtsütsüla. Iba award ya Independency Day 2026 nü sangdongtsü, ta ashi.

NSAP beneficiaries Aadhaar aser Bank account sendakteptsü tuyur

Dimapur, Metsüremi/March 18 (TYO): Sorkari tesüsa February 25, 2026 nü totuyuba ka agütsüba nung shia aliba ama pension benefit agitsü asoshi National Social Assistance Programme (NSAP) kübok Old Age, Widow aser Disability Pension number aser Account number sendakteptsüla, ta District

Welfare Officer, Mokokchung, Mangliyangba-i sangdong ka nung metetdaksü.

Anungji tang tashi Bank account den Aadhaar number mesendaktepi alirtem dang timtem majurui teyari angutsü atema tekeraba nung nüngdakba mera agitsü metetdaksür, ta sangdong ajangasa ashi.

Police atema PMKVY 4.0 skill training sentong tenzükogo

Kohima, Metsüremi/March 18 (TYO): Police personnel aser parnok kibongtem vocational skills tajungba kumdaktsütsü nükjidong nung Pradhan Mantri Kaushal Vikas Yojana (PMKVY) 4.0 kübok short-term skill training sentong ka Bodhbarnü PBC 4th NAP Bn. Multipurpose Hall, Thizama nung tenzükogo.

Iba sentong yagi 1st NAP Chumoukedima, DEF Kohima, 4th NAP Thizama, 5th NAP Phek, aser DEF Mokokchung densema units balala awajemer.

Iba sentong tenzükja Director General of Police, Rupin Sharma, IPS-i jembidang, modern policing aser career aintsü atema skill development ya tongtipang ta ashi.

Iba sentong nung Z. James Sema, NPS, Deputy Commandant, 4th NAP Battalion menden laisü.

Sentong tenzüka Associate Pastor PBC 4th NAP Vimkho Sophie-i sarasadem aser Commandant Vizhoto Hibo, NPS-i pela agizükba o jembia laisü.

Ministry of Skill Development & Entrepreneurship, Government of India kübok National Skill Development Corporation nungi Pravin Yadav, State Nodal Officer ajanga PMKVY 4.0 indang osang tejangja lemsatapa laisü.

Iba sentong nung shilem ka ama police personnel kibongtem asoshi tesem pongu nung trades balala training agütsütsü.

Palam kitsükkirung lendong nung asür kinungertem nem teyari agütsütsü



New Delhi, Metsüremi/ March 18 (Agencies): Ato Kilonser Narendra Modi-i Bodhbarnü sangdong ka ajanga, Palam nung nisung aliba ki ka arungba nung asür kinungertem nem teyari sen lakh anana agütsütsü ta sangdongogo.

Iba tia maka tatalokba nung akosartem den asükhu lemsatepba mapang PM-isa Palam kitsükkirung lendong nung yirur alirtem nem Prime Minister National Relief Fund nungi sen 50,000 agütsütsü ta sangdongogo.

"Delhi kübok Palam nung kitsükkirung lendong atalokba ya tejashitsüka lir. Ni iba lendong nung asür kinungertem den asükhu lemsateper. Yirur alirtem takaratiba nung taneptsü angutsü imla atar. PMNRF nungi asür kinungertem nem sen lakh anana agütsütsü aser yirur alirtem nem sen 50,000 agütsütsü," ta PMO-i X nung zülutsü.

Kasa mapang nung Congress MP Priyanka Gandhi-ia iba tatalokba dak sendakba nung asükhu lemsatepogo aser yirur alirtem takaratiba nung taneptsü angutsü imla ataba lemsatepogo. Laisa, Congress züngsemtem dang lendong agi kongshir alirtem nem teyari agütsütsü mepeshia metetdaksüogo.

"Palam kitsükkirung lendong nung nisung aika asüba osang angazüka temulung kanga raksar. Tsüngremi asür tanüla anisüngzükdakjang. Asür kinungertem den asükhu lemsateper. Yirur alirtem takaratiba nung taneptsü angutsü sarasadema atar. Ni Congress Party lenirtem aser party kübok inyakertem dang lendong agi kongshir alirtem nem takok tashi teyari agütsütsü mepeshir," ta lai ashi. Palam kübok Sadh Nagar

tesem nung nisung aliba ki ka nung Bodhbar anepdang züngia lia short circuit ajanga mi adoka liasü. Delhi Fire Services, National Disaster Response Force (NDRF), police aser tanga agency tem teyari agütsüba maparen balala nung sendaka lir.

Kitsükkirung lendong nung asür teku jungogo aser lendong nung nisung asem yirur lir, ta fire department ketdangsürtemi ashi.

Asürtem rongnung Pravesh (33), Kamal (39), Ashu (35), Lado (70), Himanshi (22) aser arishi küm 16, 6 aser 3 ta tetsür chanu asem Manipal Hospital nung süogo ta sangdonga liasü.

Kasa mapang nung Deepika (28) ya IGI hospital-i anir aoba sülen asü, kong ano Anil (32) aser arishi küm 2 tain tetsür chanu ka temang anepaludar. Maneni Sachin-a (29) Safdarjung Hospital nung temang anepaludar.

NIA-i bendanger 7 apuba sülen US, Ukraine nati telangzüba agütsü

New Delhi, Metsüremi/ March 18 (Agencies): Tawa National Investigation Agency (NIA)-i America nung ka densema bendanger ishika apuba dak sendakba nung parnoki ken o jangja lir ta India nung US Embassy-i shiogo. Ajüsüaka jurila kuli kar aliba ajanga iba dak sendakba nung telangzüba kecha magütsütetsü ta ashi.

NIA-i tawa bendanger tenet apu, kong America nung ka aser Ukraine nung trok densema liasü. Parnok ya Myanmar nung telungpurtem aser iba tesem temeket nung inyaksangshia aliba tenokdangba agütsür aliba teloktem nem teyari agütsütsü atema temelaba magi-i India ajanga aiba atema apu.

"Onoki ken o jangja lir, saka jurila kuli kar aliba ajanga US senso ka densema aliba dak sendakba nung kecha telangzüba magütsütetsü," ta American embassy-i ashi.

Ukraine indang Ministry of Foreign Affairs-ia, par senso trok apuba osang jangjashitsüogo aser ashiba agi parnok indang diplomatic mission-i parnok kinungertem den maneni tongtepratepdar aser ken o kanga junga asadanga atadar. Ministry-isa, India nung ketdangsürtemi

temzüng ozüng dak ajemdaker bushisüngdang südar ta shisem. America nungba ya Matthew VanDyke ta jangjaogo aser Ukraine nung trok ya Hurba Petro, Slyviak Taras, Ivan Sukmanovskiy, Stefankiv Marian, Honcharuk Maksim, aser Kaminskyi Viktor ta jangjaogo.

Delhi nung special NIA court kati parnok tenet ya anogo 11 judicial custody nung ayutsü tetuyuba agütsüogo.

FIR ajanga ashiba agi, parnok ya Mizoram ajanga Myanmar-i ai. Bushisüngdangertemi ashiba agi, parnok yagi drone dak sendakba nung telungpurtem nem training agütsüba den hadirtem agüja liasü.

Ken o jangja alirtemi ashiba agi, Ukraine nung 14 India-i tourist visa bener mapang balala nung aruogo. Guwahati nung anenba sülen parnok Mizoram-i ao aser idak nungjaki kuli kakat tejangja mebeni Myanmar-i ia liasü.

Parnok ya India nunga tenokdangba agütsür aliba telungpurtemden sendaktepa alitsü ta amanger, ta source balalai ashiba den, parnok yagi Europe nungi drone tem bener arua India ajanga Myanmar-i bener ir alitsü ta amanger, koba telungpurtem nem amshidaksür.

Asia anüolen nungi passenger lakh 2.6 India-i meyipa aruogo: MEA

New Delhi, Metsüremi/ March 18 (Agencies): Asia anüolen rara tamajungba küma aoba mapang sorkari Bodhbarnü ashiba agi, February 28 nü nungi tenzüka India-i nisung lakh 2.6 meyipa aruogo.

Asia anüolen tensa dak sendakba nung inter-ministerial senden ka nung Additional Secretary (Gulf), ministry of external affairs (MEA), Aseem R Mahajan-i ashiba agi, Bodhbarnü tayimtsü 70 shi UAE nungi India kübok tesem balalai arutsü imlar.

Tayimtsü senzusenpong tera tajungba kümogo, ta pai ashi. MEA otongdar Randhir Jaiswal-i Ato Kilonser Modi aser UAE tir Sheikh Mohamed bin Zayed Al Nahyan na Mongolbarnü phone ajanga sensaksemba indang jembia liasü.

"Lenir ana ya tang Asia

anüolen tensa indang sensaksemogo. Ato Kilonser-i UAE maka tai maketba takümtem tepsetba aser civilian infrastructure tem raksatsüba ajang ajanga aitsüba nenshia metetdaksüogo," ta pai ashi.

Lenir ana yagisa, Strait of Hormuz nung kecha tetsükdaksü makai sadem sadema senzusenpongtsü nüngdakba lemsatepa liasü, ta Jaiswal-i ashi.

"Lenir anapronglai yimjung, security aser iba tesem t a m e n d a k d a k manokshidaksütsü atema maneni inyaksü bangjemogo," ta MEA otongdar yagisa shisem.

US aser Israel nati Iran ama tenzüka sülen Modi-i tang agi tanabenbuba UAE tir den sensaksemogo.

Tehran nung India Embassy-i India nungertem aser talisa kaketshirtem nem teyari agüja arudar, ta Jaiswal-i ashi. India nungertem aikati Iran arrtsü adena Armenia aser Azerbaijan nati aitsü asoshi tejangraba aliba lemsatepogo, ta pai ashi.

"Embassy-i tetuyuba ka agütsüogo aser onoki ajak dang Iran-Armenia aser Iran-Azarbaijan arrtsü ajanga aotsü asoshi iba sülen anidaksü mepeshir," ta paisa shisem.

India-i kidanger kar dangi totzü supply asüba indang asüngdangba mapang MEA otongdar yagi ashiba agi, "iba tasüngdangba ya ni taoba mapanga langzüogo. Onoki temepishibabo agizükogo aser asenok tenüngdakba temulung dang yur itemji tang asadangdar."

Odisha nung 'cross-voting' asüba atema Congress-i MLA 3 mintok

New Delhi, Metsüremi/ March 18 (Agencies): Rajya Sabha election nung BJP-i pusemba candidate Dilip Ray nem vote agütsüba atema Congress-i Mongolbarnü MLA Sofia Firdous, Ramesh Jena, aser Dasarathi Gamango nung party nungi mintokogo.

Rajya Sabha election mapang party whips tashi mangaba atema MLA tem mintokba ya tang tasen masü saka iba ken o nung yabo Congress-i MLA tem ta tashioktsürtem ta ja liasü. Ray, shiba Odisha nung shishilembar ka lir, pa taoba mapang BJD aser BJP naprongla den sendaka liasü aser pa BJP-i teyari agüja independent ama toktep.

"Sana Khemundi MLA Ramesh Jena; Barabati Cuttack MLA Sofia Firdous aser Mohana MLA Dasarathi Gamango nung party tashi mangai Rajya Sabha election nung BJP-i pusemba candidate ka nem vote agütsüba atema mintokogo. Shirnoki Congress ashioktsür parnoki linük ashioktsür," ta Odisha Pradesh Congress Committee (OPCC)-i sangdong ka ajanga metetdaksü.

Social media nung OPCC-i item MLA asem anema post

aika lemsatepogo.

X nung post ka ajanga, "Opponent temi nü den temalen nungi rarar; tashioktsürtemi na telunglen nungi tashi meiti kümndaksür. #Traitors of #Congress are #Traitors of #Nation," ta ashi.

OPCC tir Bhakta Charan Das-i Hombarnü Constitution 10th Schedule kübok MLA asem ya disqualify sütsütsü ta tekümdangtsü metetdaksür liasü.

Taoba mapang Congress-i MLA asem nem ya show-cause notice agütsür liasü. Parnok asem yagi BJD den teka amteper inyakba atema yimjak nung party aija liasü. Gamango-ibo iba notice agütsüba atema telangzüba agütsüogo aser party whips ya Rajya Sabha election mapangbo mebenoker ta ashi.

Muslim tetsürtem rongnung mezüngbuba MLA Firdous ya Congress atema kanga tongtibang asütsü ta bilem saka la-a tebu taoba MLA Mohammed Moquim ama mintokogo.

Odisha nung Rajya Sabha menden pezü atema toktepba ya BJP-i ana aser BJD-i ka akok. Ray-i menden ka ya akokba sülen BJD aser Congress na akoksadaksüogo, shirnoki Datteswar Hota pusemba liasü.



University Grants Commission-i tawa sangdongba anti-discrimination regulations pusemba sentong ka ayongzük agiba mapang Patna University students aser police tem tsüngda mangatettep adokba noksa nung angur. Iba sentong ya All India Forum for Equity tawabangba kübok Patna nung ayongzük liasü.



TIR YIMYIM YIMOBILEM (EDITORIAL)

DIMAPUR THURSDAY, FEBRUARY (METSUREMI) 19, 2026

Chiyongtsü tama

Tang tangbo asenoki sen dang bushir saka sen dang nungibo chiyongtsü tenüngdakba. Ibaji angatetlasang asenoki sen agi chiyongtsü alitsü dang mebilemi chiyongtsü agi sen akümtsü bilema inyakla. Aji oda, tang ama alima tesem aika nung raraba mapang ya, ashiko, kibong aika nung nisung aika ket nung senbo aika lir saka chiyongtsü alitsü makokba agi timtem nung alitsüa akok, kechiyong sen agi masü saka chiyongtsü agi dang tebok asüngtsü. Aji oda, tanü US aser China ama kintem ya raraba oset tesashi balala yanglutetba agi alima nung tangar kintemi nukentsübutüsü akümba ya, parnok tokolok chiraba kisung agi masü saka par lima nung chiyongtsü peria züsentetba agi inyaktetba mapatem lir. Asenok kidanga mapa inyaksü tapu meyina bilemyonga chiyongtsü mekara meinyaktettsü, kechiyong tamasa pei bok süngmatsüla aser anogo shia pei bok süng bushia ayanga senzüba taküm kati pei lima aser nübortem asoshi inyaksü mapang anogo kata magütsütettsü. Aji oda, tanü putu yabo ali sepaitem tejak o tejak na ajurutepa raraba putu masü kümogo. Aji dang masü saka AK 47 ama prangpong tesashia nungdak maka kümogo, kechiyong alima ka nungi kati anünglen nungi dang bomb agi tayimtsü kümer makteper. Aji oda, lilang nungi drone aser missiles agi yimti amakba dang masü saka nisung senzüba dena reprangteta pokseta südaksür. Iba ama raraba oset tesüngmangtsü aser tesashi yanglutetbaji nisungtem tokolok chiraba kisung agi masü saka parnok asoshi chiyongtsü bushitsü atema tebilemtsü mali, rongsen aser mapang peria endoka inyakba ajanga inyaktetba takok mapatem lir. Itemji kodang bilemdangdir, tanü asenok yimten nüchiso bushiba mapa ya kodanga mataloktsüba mapa ka asoshi asenok timtemer amai asenoki angatettsü. Atangji, asenoki asen temeten aser asen jenjang meteta lir, ibayongji timtem takoksa aika arema tanü tashi yimten nüchiso asoshi raraba tongpang nung nokdaker. Ajisüaka, asenok ajak tanü chiyongtsüa maka, India sorkar nem mesüdaksür. Ibaji dang masü saka tanübo, akhi ama, asenoki prangpong injang amshia India sepaitem den raratsübaji putu yimya den mapet kümogo. Aji oda, akhi ama, asenok arem nung tesepe yanglur alitsübajiang, ano, lendong tuluba kümogo, kechiyong anünglen nungi ali nung tsükchirtem aliba aser senzüba ajak jangjajangjaa angur, anungji bomb agi tayimtsü kümer arua itemji makdoksü, anungji, maparen ajak nung asenoka tanü putu den apet inyaka alitsübaji kanga tongtibang kümogo. Aji oda, asenokbo khen tetenzüleni meyipa lur, asenoka asen peribo züsentettsüa government-i anir aluyimba nung ya temulung agütsütsüla aser government-ia meyariyonga pei chiyongtsü asoshi shisabolua bilema chiyongtsü züsenba nung senso shiai temulung agütsütsüla. Tang ama alima rara ajanga gari totzü aser soruchiokba gas mangutsüa akok, ajisüaka itemji maliyonga takumbo litettsü, ajisüaka chiyongtsü mekara taküm melitettsü, anungji injang bomb tsübuba agi masü saka aya maremba agi tsükchir tsüngdang apudaktsüa akümtsü. Atangji, asenoki alima aienba angur saka tanü tashi asen lima nung asenoki asen nungdak nung amshitsü yanglutetba oset kecha maka, chiyongtsüa tangari züsentetba aser oset-a tangari yangluba alia achir aser amshir. Aji oda, asenok kar anogo shia government office-i aoer aser kar ayangi aoer aser tanüngbaji kazüa amonger, anungji asenok asoshi asen akaba rongsen amshia asen kolok aser shisatsü agi mapa tasen ka tenzüka inyakdangtsübaji asen mapa aser mapang agi memelar. Iba tia ya yimten nüchiso bushir teloktemia khen bilemdanga tanü putu dak apet yimten nüchiso asoshi raraba sentong memelenshira, tangar tsüngdang tongpang nung asenok mak asütsü. Kasaji, state government-ia, joko, asenok taila lima aser sentong nung dang alitsü memerangi asangsang limai adoka nübortema peisasa pei bok süngabo litettsüa ochi lenisüba sentong agütsü tenzüksüla. Atangji, yimgten nüchisoji nübortem asoshi bushir aser government nung alirtemjia nübor tenzükertem lir, anungji nübortemi parnok dang nungi tajung imlatsübaji tim dang lir. Ajisüaka, senso shiai pei taküm alitsü asoshi pei peri chiyongtsübo piesasa züsentettsüla, idangji dang asenoka tanga nungdak inyaksü mapang angutsü aser tangari asenoka nisung amai züngshitsü.

OLEMSABANG

SHIRNOK DANG LENNIR TAJUNG TA AJATSÜ ?

~ L. Kika Pongener.

(Yashi adok nungi...)

Lennir tajungi yimden, arogo, lokti nung mepetmesu/ telemsa atoktsüsa tsükchitep o mejembir. Lennir tajungi ngasangadema, mezümeküma aser asüküma ken o mejembir, saka yimli o jembir. Lennir tajungi tenukmerem, mokokachi aser anemsu agi tangar tilu-panglua sensa-masa masür. Lennir tajungi pei atenba telok, yimden, arogo, lokti nung mepetmesu aser telemsa atokdaktsütsü ajungmeso masür, mesura sentong matonger. Lennir tajungi pa/la atenba telokji akümtsübua wazüka kümzüka ayur. Lennir tajungi pa/la adenba telok tashimait indang sensa-masa-a/ tetla-tetshia yimjak nung aser lokti nung mejembir. Lennir tajungi lokti ajungtsü asoshi nungsen metsübur, pei ajangzüktsü mebushir aser tasü-ita ochi nung nokdaker.

Alima aser loktiliba raksaba ya shirnok ajanga tuluba raksar (?) ta bushidangra; nisung tamajunger mangateteri raksaba dang nungipo; nisung tajung tangateter nisung shirnoki majunga ta meteter; meshitaka ta ajiteter; tai-a ta angateter; saka nungsen maginuba agi ola madoki toktsür; mesura anemsu agi tajung agia junger ta tenungsang agütsür; parnok jagi yimden, arogo aser loktiji tuluba raksar ta tashitemeteri ashir. Ano aji tang masü, lennir karibo lokti nungpo ola madoktsü aser kecha mejembitsü; saka kipok nungpo nungsen jembia jajar; iba ama lennir jagi yimden, arogo aser lokti nung meputep aser mepetmesu atokdaktsür aser külem tenzüker tsüngda nunga tsükchitep dendaktsür. Anungji pei kechi angatet aji lokti nung indang-indanga jembitsüla. Lennir tamajungi teti yimden, arogo aser loktiliba nung mepetmesu aser telemsa atokdaktsütsüsa ken o tamajung meshisadangi tapi-tapi agi jembir.

Asen mimchir libaliru nung tsübuba ya tapu ana lir. Tsübuba kaji...Molosongzü, Keyi, Pongzü aser Temenen Mojing tsübuba (Fear) ya asütsü...Tanabubaji akümtsübuba (Respect) ya asütsü. Tsübuba (Fear) nungji tesempa dena lir, saka akümtsübuba (Respect) nungjibo temeim dena lir. Shirnok jaklaliru, jembishinu, libaliru tajung, ajak den küsa liteter; aser ochishia mapa tajung inyaker....Parnokji tulur-tilar ajaki akümtsübur. Nisung'er libaliru nung ajaki akümtsübuba taküm junga litetbaji ajak dang sempet tajungtiba lir. Anungji asenok ajaki asenji tangari Molosongzü, Keyi, Pongzü, Mojing tsübuba amai tsübutüsü masü; saka Tsüngrem dang akümtsübuba amai akümtsübutüsü taküm libaliru junga alitsü kanga tongtipang lir. Lennir tajung ta ajatsüba ya odangbo majar; kechiyong nuburi temulong lemtettsüsa; nuburi tamang kaatettsüsa; ochishia mapa tajung inyakba; ajak den küsasa putepa aser lirumedema litetba; iba amala lennir ka dangji dang lennir tajung ta ajar aser iba ama lennirji nubur ajaki akümtsübur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Counselling mapang tim masüba yimya amshiba mechi pastor ka apu

Thiruvananthapuram, Metsüremi/March 18 (Agencies): Kerala nung pastor kati counseling mapang arishi küm 19 tain tetsür ka dak tim masüba yimya amshiba mechi apuba sülen Protestant bishop kati pa kübok aliba putir ajunga dang pastoral counseling session ya surveillance camera kübok agitsü totuyuba agütsüogo.

Police temi March 15 nü Church in Idukki district indang vicar, Father Santosh Mathew apuba sülen Church of South India's Madhya (Central) Kerala diocese indang Bishop Malayil Sabur Koshy Cherian-i iba totuyuba ya agüja liasü.

Taoba ita iba timtem ajuru aliba kinungeri police nem ken o agütsüba sülen arishi küm 53 tain pastor ya jenshia senzüa liasü.

Police team kati Mathew ya anasa Tamil Nadu state kübok Velankanni nung Catholic Marian pilgrimage center nung aliba putet. Kerala nung court kati pa judicial custody nung anogo 14 ayutsü totuyuba agütsü.

Police nem ken o agütsüba

nung iba tim masüba mapa inyakba ya February 7 nü liasü. Iba anogo tetsürla den la tetsü tenati counselling atema Mathew ajuru. Pa la tetsü dang tekülem ki telung nung sarasademtsü ashi aser la ya presbytery-i anir oa tim masüba yimya amshi, ta ashi.

"Asen bishop-i counselling sessions ajunga CCTV cameras agi ngua agitsü totuyuba agütsüogo," ta diocesan treasurer Father Jiji John Jacob-i UCA News dang March 18 nü ashi.

CCTV recording ya iba ama tim masüba yimya amshiba nungi kumzuka ayutsü aser kuli atema kisung lir aser tamangba yimsü melenba record masütsü ta Jacob-i jangjatsü. "Counseling aginer indang privacy kumzuka ayutsü," ta pai ashi.

Kasa mapang tai tonglokja alisang pastor ya mapa nungi anenja lir. "Pa anema ken o benoka aliba ochi metettsü asoshi onokia bushisingdang ka tenzüokogo," ta Jacob-i ashi.

Diocesan clergy secretary, Father Aniyen K. Paul-i ashiba agi, CSI nung tetsür dak tim

masüba mapa inyakba aser yimya amshiba atema 'zero-tolerance policy' lir.

"Pastor ya aibelena aliba jangjatetra arogoi pa kumzuka mayutsü," ta ashi.

Arogo ketdangsür kati putir ya taoba mapang iba ama mapa tamajung inyakba mali, ta UCA News dang ashi.

"Police-i bushisingdang tembangba atatsü, kong tai tonglokja aliba indang ochi temai adoktsü," ta ketdangsüri ashi.

Tsükchitep aser kinunger tsungta mangatettep adoka aliba angatetteptsü mechi putir ya asaa sang nung ashi südi ta diocese aser parish nung alirtemi amanger ta ashi.

CSI ya 1947 küm Britain nungi India nüchiso anguba sülen Protestant denominations indang lokti ka ama tenteta liasü. North India nung parnok den sako telok dang Church of North India (CNI) ta ajar.

CSI nung züngsem million pezü shi lir aser ibai India nung second-largest Christian denomination lir. Parnok dioceses 24 lir aser Sri Lanka nunga ka lir.

ANOGO ABEN TSÜNGREM DEN

Khrista ochi takokba

"Aser tongtibangtem aser aintem rakzük, item madak takokba kuma pai item jungkai adoka sayuogo" Kolosi 2: 15.

Yisu Khrista aser tenyartem tenzüokba mapa nung tashishitsü ka adokbaji tepuokertem nüji kuma yoktsü ta sayuba nung liasü. Ibai tesayuba peria magütsüba ajanga liasü. Asenoki tamajungba tashi den koda tsükteptsü aser puoka alirtem koda nüji kümdaktsütsü shisadangi.

Kangkidong tejkadong Tsüngremi ain agüja shimtetbatem - Yisu aser pa tenyartem - alima tamajungba tashi den tsükteptsü asoshi ain nüngdaka liasü. Saka kangki nung aser shia aruba nung tanela tongpang rara teti asoshi temelenshi ka bener aru. Mezüngbuba nung Yisu asüba aser shia aruba ajanga amjang aser yimli nung yimsüsürtem ain samatsü (Kol. 2: 15). Kangki jakdang, "Kotak nung aser alima nung ain tashi" Khrista nem magütsütsü liasü. Saka tang shia aruba Khrista dak tashi ain ajak kar (Mt. 28:18). Kangki ajanga satanji tamakoker tsükchir ka kümdaktsü, aser shirnok Khrista dak lir parnok madak pa tashi kecha maka. Khristar takokba aser satan tamakokji tsükchir den raratepba nung mezüngbuba takok meraji lir.

Tanabubaji, Khrista asüba aser shia aruba nung tamanger ajak taküm lidaktsür aser tang kotak nung pa den mendaktsür (Ef. 2:5,7). Na joko tezü nung alir masü, na Khrista den, shiba tashi ajak aka pa den amener. Tamajungba noktangtsü asoshi Khrista ain angatettsü nüngdak. Tamajungba den raratsü Tsüngremer raraba sobutsüba ne mapa. Tamajungba madak takok anguba nung shilem agir nia kümdaktsüba asoshi Yisu, Ne tenüng asanger. Maneni tamajungbaji noktangtetsü Nai yariang ta asenoki shidi.

Nigeria kübok Kaduna state nung pastor ka tepset

Abuja, Metsüremi/March 18 (Agencies): Fulani shiruru metsürtem südi ta temulung melemi aliba telok kati February 26 nü Nigeria linük kübok Kaduna state nung pastor ka tepset aser tamangertem pua bener ao ta yangji alirtemi ashir.

Evangelical Reformed Church of Christ (ERCC) indang Rev. Joshua Ajiya ya Sanga County kübok Khristanpur timba aliba Dorowa Maitozo yimtsüng nung aonung 8:30 ako meta tepset aser iba mapang ano tamanger ter dak tema pua bener ao, ta yangji alir Pastor Emmanuel Stephen-i ashi.

"Fulani bandits temi Kaduna state nung Sanga Local Police Area kübok Ninzo Chiefdom nung aliba Maitozo nung Dorowa community amak. Iba mapang ERCC Randa Conference kübok Dorowa community nung ERCC Church indang pastor Rev. Joshua Ajiya tepset. Pa Dorowa community nung aliba arogo nung ita ana dang tenzüker alidang Muslim Funali bandits temi tepset," ta Pastor Stephen-i ashi.

Dorowa nung security tsütsü timtem balala ajurua arur, ta pai ashi. Yangji alir Thomas Hassan-ia iba lendong atalokba sülen yimdaklir aika samar bushir ta ashi.

"Iba timtem ajurur aliba kibongtem Tsüngremi anisüngzükjang aser iba ama tensa tamajungdang ozü nüburttem maneni kumzuka yuangma," ta Hassan-i ashi.

Sanga County nungsa Arak

yimtsüng nunga iba mesük lendong ataloka January 5 aonung tamanger 30 dak tema pua bener ao. Fulani shiruru metsürtemi iba mapang tamanger ana tepset ta yangji alirtemi ashir. Pua bener aortem rongnung tamanger ana tepsetba rongnung Kefas Habila Averik tetsü Averik Arak dena liasü.

October 1, 2024 nungi September 30, 2025 tsüngta Nigeria nung Khristanpur tepsetba dang timba danga linük kecha nunga tepseta mali, ta Open Doors indang 2026 World Watch List ajanga ashir. Iba mapang alima nung tamangba yimsü mechi Khristanpur 4,849 tepsetba nungi shilem 72 (3,490) Nigeria nung lir, aser iba jakdang tamanger nisung 3,100 tepseta liasü. Alima nung Khristanpur alitsü linük tamajungtiba 50 asadanga World Watch List 2026 nung Nigeria ya jenjang 7 buba nung lir.

Nigeria aser Sahel nung Muslim Fulani ya million aika lir aser parnok tezü balala nungi jakzük saka aikati tashiyim mamshir, saka Fulani kari radical Islamist ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga 2020 report ka nung shia liasü.

"Parnoki Boko Hara maser ISWAP tasa den mesüktepa amshir aser Khristanpur dak tenük yokba tejangja sayur," ta APPG report nung shia liasü.

Nigeria nung aliba Khristan lenirtemi ashiba agi, shiruru

metsürtemi Nigeria indang Middle Belt nung Khristanpur amakba ya tashiyim amshia Khristanpur ali agitsü aser Islam yimsü benoktsü tejangraba nung lir, kechiaser lisem lima kuma aoba ajanga parnok indang shiruru takum kumzuka ayutsü tasak akumer.

Islamabad nung Khristanpur meindoktsü amokmerener

Islamabad, Metsüremi/March 18 (Agencies): Pakistan yimtiba Islamabad nung colony asem nungi Khristanpur meindoktsü amokmerera nungi anisüngzük angutsü mechi Pakistan nung Khristan lenirtem aser ozüng yanglur ka lenmang bushitar.

"Ibai Khristanpur anema taochi makaba yimya lir. Parnok anisüngzük angutsü tetemsü," ta National Assembly nung tamanger züngsem Naveed Aamir Jeeva-i March 15 nü ashi.

Taoba hopta Capital Development Authority (CDA) ajanga Islamabad yimti kübok Rimsha, Allama Iqbal, aser Akram Masih Gill slum settlements nung alirtem ainshitsü totuyuba agüja liasü, kong Khristanpur timba sür nisung 25,000 shi alir.

Iba totuyuba ya megaphone ka ajanga sangdong, kong Jeeva-i tai apu.

"Kechiba CDA-i tebang agi totuyuba agütsür?" ta Pakistan People's Party nungi ozüng yangluri asüngdang aser tamangertem dang iba ken o ya parliament nung aser Ato

Kilonser Shehbaz Sharif den agüjang" aser "CDA süoka jembitsü ta ashi.

"Supreme Court ajanga 2015 küm stay order agüja aliba nung ketdangsür temi aibelen asü masü ta okatsür temi lepa reprangtar," ta pai ashi.

CDA ajanga working-class nisung 20,000 dak tema talidak ki raksatsüba sülen Supreme Court ajanga 2015 küm stay order agüja liasü.

Kasa mapang Islamabad nung jashia aliba Khristanpuri maneni longkak aiter aser March 15 nü Rimsha Colony nung rally ka nung yimten yimsüsür, activists aser arogo lenirtem dena liasü.

Awami Church nung Catholic putir, Protestant aser evangelical pastor temi anir sarasadema yimjung aser telungjem nung longkak aittsü ajungshia liasü.

Islamabad-Rawalpindi dioces indang parishes 25 nung aliba makamait Khristanpur asoshia sarasadema liasü.

Tetsür aser tanurtem densema longkak aiter temi, "Onok nem ozü temeden

agüjang" aser "CDA inyaksangshi onoki magizük" ta ayimtena liasü.

Our Lady of Fatima Church indang parish priest Father Sylvester Joseph-ia ketdangsür temi Khristanpur timba aliba tesem azüngtettsü merangba aija liasü, shirnok arishi küm 14 tain Rimsha Masih anema tiazü nung tamangba yimsü mezüngmeshi ta tai tonglokja tensa tamajungba akumba sülen 2010s tetenzüklen iba tesemi anir arua liasü.

"Islamaba dya modern capital ka kümdaktsütsü asoshi federal government-i December 2025 nung tenzüokba küm ana mega-development plan Vision 2027 nung shilem ka ama evecton operation ya lir," ta Joseph-i UCA News dang ashi.

Iba sentong nung shilem ka ama Muslim nung colony ana aser mosque ka makepdokogo.

"Ajisüaka onoki maneni longkak aittsü, compensation mesüra temelen ali meshitsü. Sensaker kibong 5,000 tarutsü tia mejangjai lir," ta putiri ashi.

AO OSHI ANGAZÜKDAK:

TANÜ ANGAZÜKTSÜBA OJANG



Wakjiwaklem

(n) koktetkokra (swollen part of a tree, bulging out in places)

* Wakjiwaklem aketba süngdong kisü jensü dang magir.

Waklongwakshi

(adj) temang tesüsü masü, tawak amai aliba (swollen type of body or face)

* Yi jemer aika tejak waklongwakshia akümer.

OLONG PAITEP # 7448

1		2		3		4	5		
				6					7
		8							
9				10		11			
			12						13
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S___i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 7447 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsünpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER



Rossetti brothers ta ajar Pickleball players Angelo Rossetti aser Ettore Rossetti nati minute ka nung 113 consecutive volleys züktetba atema alima otsü tasenka yangluogo.

National Cancer Prevention Month nung cancer survivors yaritsü atema Dynamic Universal Pickleball Rating (DUPR) den sendaktepa shilem agidang Rossetti brothers-i iba otsü tasen yanglutetogo.

Tesüiba nunga tenati tennis aser pickleball naprong nung Guinness World Records yangluteta lir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.



*In Loving Memory
of Aemla Yaden*

19/03/2016 - 19/03/2026

On her 10th death anniversary, we remember a soul so gentle and a presence so deeply loved. A decade has passed since you left us, but not a day goes by without remembering your gentle heart and loving presence. You may be gone from our sight, but never from our hearts. Rest in eternal peace.

From your beloved family members

NEIAFMR, Pasighat-i traditional healers atema sentong ayongzük



Itanagar, March 18, 2026

(Agencies): North Eastern Institute of Ayurveda & Folk Medicine Research (NEIAFMR), Pasighat nung March 17 nü awareness aser capacity-building programme ka agiogo.

Iba sentong ya Northeast India nung traditional healers atema ayonga agi. Iba sentong ya Ayurveda practitioners aser traditional healers tsüngda

sensaksemtsü, knowledge exchange aser AYUSH mainstream nung healing practices dendaktsüsü atema agiba lir.

District Medical Officer (DMO), Pasighat Dr. Yagling Perme-i tongti tesemdanger ama shilem agi aser Director (I/ C) Dr. Inya Lingu-i tesentepertem pelaa agizük.

Iba sentong nung shisalen sayurtemji Dr. Jayakrishnan K

aser Dr. Sajeena A na liasü aser tenaprong ya iba institute nung Assistant Professors lir.

Organising Secretary Dr. Imlikumba-i capacity building nungdakba aser mainstream healthcare nung traditional healing systems sendakteptsü indang onük jembi.

Ministry of Tribal Affairs nung Project Officer Dr. Harshita Bhatnagar-ia sentong nung o jembi.

Manipuri writer Haobam Nalini-i Sahitya Akademi Award angu

Imphal, March 18, 2026

(Agencies): Manipuri writer Haobam Nalini nem Manipuri language category atema Sahitya Akademi Award 2025 agütsüogo.

Nalini-i short story collection Kanglemdriba Eephut atema

iba sempet nguogo. Iba sempet ya India nung literary honour tematiba lir aser India oshi balala nung kaketkenotem agizük.

Manipuri category atema jury nung H. Nani Kumar

Singha, Irungbam Basanta Singh, aser Mongsatabam Tuleshwari Devi nung liasü.

Parnoki entries aika repringdangba sülen Kanglemdriba Eephut shimeteta sempet agütsü.

Mizoram sorkari AAI ket nung Lengpui airport agütsüsü



Aizawl, March 18, 2026

(Agencies): Mizoram sorkari Indian Air Force (IAF) den Lengpui Airport atema jembishinüba tembangogo ta Chief Minister Lalduhoma-i ashi.

Civil society organisations aser political party temi Lengpui airport ya Airports Authority of India (AAI) ket nung agütsüsü ta ashiba agizüka IAF den jembishinü temogo ta

pai ashi. IAF-i tebilemba tajung lemsatop saka sorkari nübertem taginüba ama AAI den ang jembitsü lemtetogo ta Chief Minister-isa metetdaksü.

Ajisüaka AAI denbo IAF-ia tebilemba tajungba lemsatopogo ta Lalduhoma-isa shisem.

"Tarutsü nung AAI-i airport ya outsourcing operations asütsü akok. Anungji third party ka nem airport magütsüdang

Mizoram sorkar nungi temelaba meshitsü indang clause ka adentsü onoki rongshir. Ajisüaka AAI-i tang tashi ibaji magizük" ta CM Lalduhoma-isa shisem.

Lengpui Airport nung infrastructure aser buildings indang formal valuation ka agidar. Iba ya tembangba sülen AAI-i Mizoram sorkar nem temenok agütsüsü imlar ta paisa metetdaksü.

GOVERNMENT OF NAGALAND
STATE COUNCIL OF EDUCATIONAL RESEARCH AND TRAINING
KOHIMA: NAGALAND.
ADVERTISEMENT

Dated, Kohima, the 16th March, 2026

No. SCERT /ADM/RECUIT/GR-3/2023 As per the approval of the Government of Nagaland Vide letter NO. DSCERT/VER-REQ/2025 dated the 27.02.2026, applications are hereby invited from bonafide indigenous inhabitants of Nagaland for filling up 1(one) post of Drivers under the Department of SCERT, Nagaland, Kohima. This is issued with the clearance accorded by the P&AR Department Vide U.O No. 1417 dated 06/02/2026 and Finance Clearance vide RFC/ESTT.No.31/35 dated 24/02/2026.

Sl. No	Name of the Post	Number of Post	Pay Matrix
1.	Driver	1 (one)	Level-3

Eligibility Criteria

- Educational Qualification required will be Class 8 Pass and above.
- Age limit shall be Minimum 21 Years during the date of publication of advertisement and Maximum Age limit is 37 years, relaxable for Government employee equal to the number of years they are in service, subject to a maximum of 5 years.
- Documents required (mandatory).
 - Educational Qualification Certificate.
 - Birth Certificate
 - Indigenous Inhabitants Certificate, ST, BT Certificate.
 - Backward Tribe Certificate (if applicable).
 - Valid Driving License.
 - "No Objection Certificate" (NOC) from Head of Department with name and Official Seal, indicating the date of initial appointment of the candidate (if applicable).
 - Employment Exchange Registration Card.
 - 3 (Three) Passport size Photos.
- 5 (five) years driving experience preferred.
- Candidates will be assessed in the areas of General Knowledge, Driving Skills, Identification of Vehicle parts & Traffic Signals.
- Application forms will be issued in the Directorate of SCERT, Nagaland, Kohima or can be downloaded from the SCERT website (scert.nagaland.gov.in) from 17th to 30th March, 2026
- The filled forms should be submitted in person at the Directorate of SCERT, Nagaland, Kohima (Near Rüzühkhrie Government Higher Secondary School) on or before 07th April, 2026. Application form will not be accepted after the last date.
- After due scrutiny of all relevant documents, list of the eligible candidates will be uploaded in the SCERT website (scert.nagaland.gov.in) and Office Notice Board on 10th April, 2026
- Admit Card will be issued on 13th and 14th of April, 2026 during office hour. Date and Time of the Test will be notified during the issue of Admit Card. An amount of Rs. 200/- will be charged as Application/Exam fee on the time of issuing of Admit Card.

Sd/-
 (KEVIRALE-Ü KERHUO)
 Director
 SCERT, Nagaland Kohima.

OFFICE OF THE CHIEF ELECTORAL OFFICER
NAGALAND : KOHIMA

No. ELE/IT-CDT/21/2026/Pt Dated: 17th March, 2026

cVIGIL

Bye-Election to the Nagaland Legislative Assembly
from 28-Koridang (ST) AC, 2026

- cVIGIL is an online application for citizens to report on Model Code of Conduct violations/Expenditure violations.
- Download the ECINET app from Google Play Store/ Apple App Store, then go to conduct of Election and select the cVIGIL app.
- For details, visit the official website of the Chief Electoral Officer, Nagaland, www.ceo.nagaland.gov.in

Sd/-
Chief Electoral Officer,
Nagaland, Kohima.

OFFICE OF THE CHIEF ELECTORAL OFFICER
NAGALAND : KOHIMA

No. ELE/IT-CDT/21/2026/Pt Dated: 17th March, 2026

Suvidha

Bye-Election to the Nagaland Legislative Assembly
from 28-Koridang (ST) AC, 2026

- Suvidha is an online application for Candidates and Political Parties to apply Nominations and Permissions online, through ECINET using the URL https://ecinet.eci.gov.in or mobile Application.
- For Mobile Application, download the ECINET app from Google Play Store/ Apple App Store, then go to conduct of Election and select the Suvidha app.
- Detailed procedure for filing online Nominations and Permissions can be downloaded from the official website of the Chief Electoral Officer, Nagaland, www.ceo.nagaland.gov.in

Sd/-
Chief Electoral Officer,
Nagaland, Kohima.



IMPUR BIBLE SEMINARY

P.O. Impur-798615
 Mokokchung: Nagaland

Impur Bible Seminary nung :

- Ao oshi agi küm 3 Diploma in Theological Studies (DIP.TS).
- Bachelor of Theology (B.Th) küm 3 (English Medium) affiliated to the Senate of Serampore University.
- Cross-Cultural Missionary Training, Church & Mission ABAM aser IBS partnership nung September 2026 nungi iba sentong agütsütsü. Anungji tali terajemba nung osang agitsü asoshi, tejangrartemi Seminary den tongteprateptsü metetdaksür.

Nüngdakbatem :

- Diploma :-** Tanaben asoba Khristan aser Tsüngrem tenzüksü bendanga agutsüba. Class Eight pass.
- B.Th :-** Tanaben asoba Khristan aser Tsüngrem tenzüksü bendanga agutsüba. Higher Secondary School Leaving Certificate (HSSLC) or equivalent.

Tanela nung tashi itshitsü, academic excellence aser Tsüngrem tenzüksü terenemshiba akatsü asoshi IBS nung arua zügangma.

Tongteprateptsü atema:
7085896263 / 7085896324

ALI
AYOKER

AT NIHOTO VILLAGE (NEAR 4 LANE)
PLOT AVAILABLE @180/- Per Sqft.
(Slightly Negotiable)
Contact: 9612242850

Israel-i maneni Lebanon amak; nisung 20 tepsetogo

Beirut, Metsüremi/March 18 (Agencies): Israel-i Lebanon yimtiba Beirut densema anüoletip aser teyongtsü nung Bashoura kübok ki ka makogo, ta Lebanon National News Agency (NNA)-i metetdaksü. Iba tesem azüngtettsütsü atema osang agütsüba sülen mapang tatsüka dang lir maka liasü.

Israel-i Bodhbarnü Lebanon kübok tesem balala nung nisung 20 dak tema tepsetba den aika yirutsüba nung iba tesem amakba ya-a shilem ka liasü, ta linük Ministry of Public Health-i ashi. Israel Lebanon yimtiba densema anüoletip aser anütoklen tesem balala makogo. Anüing ajanga Beirut amakba mapang nisung trok asü aser aika yirua liasü. Beirut nung Al Jazeera osangbener Zeina Khodr-i ashiba agi, Israel-i manger mesangwa tsüngda linük yimtiba Beirut densema Lebanon kübok tesem balala makogo.

(Maneni tapak 8 nung...)

Israel-i Iran Intelligence Minister Esmail Khatib tepsetogo

Tehran, Metsüremi/March 18 (Agencies): Mongulbar aonung sepaitemi Tehran nung tayimtsü amshia amakdang Intelligence Minister Esmail Khatib tepsetogo ta shir ghonda ishika lir Bodhbarnü Iran Tir Masoud Pezeshkian-i Khatib asüba jangjatsüogo aser pa tepsetba ya tasü mait mapa ka lir ta ashi.

Social media sapang X nung, "Tasü mait mapa inyaka külem tenzüker Esmail Khatib, Ali Larijani aser Aziz Nasirzadeh nunge den parnok kinunger kar aser parok den alirtem tepsetba ajanga onok kanga khukhua mang ayimer," ta Pezeshkian-i zülua liasü. Aji masüdag Israeli Defence Minister Israel Katz-i Mongulbar aonung amakdang Khatib tepsetogo ta shia liasü. Timtem lir ta ajitetba Iran ketdangsürtem dak tenük yoktsü Israel mitkar nem tashi agütsüogo, ta pai ashi. "Ato Kilonser Benjamin Netanyahu künati IDF dang itdangiter aser operational circle maparen temer aliba Iran ketdangsür samatsütsü temelaba agütsüogo, aser item asoshi temelaba balaka menüngdaker. Onoki maneni parnok ajunga bushia tepsettsü," ta Katz-i ashi. Khatib ya August 2021 nung Iran tir inyaka alisang Ebrahim Raisi-i shim aser tasünü tashi Iran indang itdangiterba nung tematiba ketdangsür inyaka liasü. Raisi ya 2024 küm helicopter ka tsükokba nung asü.

Israel-i amakba mapang senior security chief Ali Larijani den Iran indang Basij paramilitary force commander Brigadier General Gholamreza Soleimani tepsetogo ta Iran-i jangjatsür anogo ka lir Israel-i Khatib tepsetba sangdonga liasü.

US aser Israel nati February 28 nü Iran amakba sülen iba rara ya hopta ana dak tema tesashiba kuma arutar aser iba mapang Supreme Leader Ayatollah Ali Khamenei tepseta region nung rara tuluba akum. Iba sülen anatsülen nungi tayang kepzüktepa makyonga arur aser Middle East nung tensa tali tamajungba akumer.

Thomas & Uber Cup nung India team China den ata lir

Metsüremi/March 18, 2026 (Agencies): India tetsür aser tebur badminton team Thomas aser Uber Cup nung team tajung den ata lir. Iba asayamung ana atema draw ya Badminton World Federation (BWF)-i Bodhbarnü sangdonga liasü.

34buba Thomas Cup aser 31buba Uber Cup ya Horsens, Denmark nung April 24 nungi May 3 tashi asayatsü.

India tebur team, shirnoki 2022 küm iba asayamung mezüngbuba koka otsü tasen yangluogo, parnok Group A nung defending champions China, Canada, aser Australia den ata lir.

India team taoba asayamung nung quarterfinals nung China-i tsükdaktsü, shirnoki asayamung koka liasü

Uber Cup nung India tetsür team Group A nung iba asayamung 16 ben koker aliba China, hosts Denmark aser Ukraine den ata lir

India tetsür team taoba asayamung nung quarterfinals nung Japan-i tsükdakja liasü.

China tebur team nung

asayar tajung agika lir, kong Shi Yu Qi (world No. 2), Li Shi Feng (No. 7), Weng Hong Yang (No. 17), aser Lu Guang Zu (No. 18) nunger ajak densema lir.

Ajisüaka Lakshya Sen-i tawa All-England Championships nung Feng akokba ajanga team ajungmesotsü imlar.

India team-i 2022 küm Bangkok nung mezüngbuba Thomas Cup koka iba asayamung akokba linük trokbuba aküm. Final nung parnoki Indonesia team 3-0 agi koka liasü.

Badminton Asia Team Championships sülen BWF men's team rankings dak ajemdaker India team 2026 Thomas Cup atema qualify süogo. Tetsür team-a world rankings ajanga Uber Cup asoshi qualify süogo.

Team 16 ya telok pezü kuma lemsar round-robin league ka asayatsü, kong asaya shia kija asaya asem aser tarep asaya ana asayatsü. Telok ajak nungi temaba jenjang nung

tembangba team anana quarterfinals-i aitsü.

"Onok team tajung den ataogo aser Thomas Cup aser Uber Cup naprongla nung quarterfinals atongtsü maongka lir. Onok team tashi tait lir aser temaba jenjang nung aliba team tema koktettsü ta sayuogo aser quarterfinals atongba sülen takoktsü aika lir," ta Badminton Association of India (BAI) secretary general Sanjay Mishra-i ashi.

Thomas Cup:

Group A: China, India, Canada, Australia;

Group B: Japan, Malaysia, England, Finland;

Group C: Chinese Taipei, Denmark, Korea, Sweden;

Group D: Indonesia, France, Thailand, Algeria.

Uber Cup:

Group A: China, India, Denmark, Ukraine;

Group B: Japan, Malaysia, Turkey, South Africa;

Group C: Chinese Taipei, Indonesia, Canada, Australia;

Group D: Korea, Thailand, Bulgaria, Spain.

NWA Nagaland Olympic & Paralympic atema renemer

Dimapur, Metsüremi/March 18 (TYO): Nagaland Wushu Association jongdak senden ka March 17 nü Nagaland Olympic Association office Complex, Kohima Talimeren Hall nung menogo.

Iba senden ya taruba Nagaland Olympic & Paralympic Games 2026 nung Wushu asaya ayongzüka asayatsü asoshi ken o balala sensaksemtsü atema ayongzüka liasü, ta ketdangsurtemi metetdaksü.

District 9 indang Wushu Associations ketdangsurtemi iba senden nung shilem agiogo. Senden nung NWA kübok züngoksema aliba unit ajak dang taruba asayamung nung shilem agitsü atema ajungshitsü aser Northeast Games 2026 nung state tenüng nungi asayatsü asoshi asayar tajungibatem shimtsü atema sensaksema liasü.

Senden nungsa asayamung nung iba asaya kecha tetsükdaktsü makai asayatetsü

atema technical personnel tem arangtetsütsü asoshi technical session ka ayongzüka agitsü mulungtepogo.

Kasa mapang nung Nagaland Wushu Association-i, Tseminyu District Wushu Association aser Niuland District Wushu Association ta district tasen ana Nagaland Wushu Association nung züngoksemtsüogo.

Ajak senteper District Associations 14 Nagaland Wushu Association nung züngoksema lir. NWA-i district ketdangsurtem ajak dang asayatem tanur asüba mapang bushiteta parnok professional kümdaktsütsü asoshi anitetsü ayongzüka liasü.

Senden nung shilem agiba züngsemtemi Kudecho Khamo, President, Nagaland Wushu Association & Hon'ble Advisor, CAWD & Taxes dang pai maneni iba Association nongita yariba aser lensayuba atema kanga pelaba lemsatepa liasü.

BENDANGLI OSANG : Tapak 7 nungi...

Israel-i maneni Lebanon amak...

Israel-i amakba 15-storey building ka kima nokdaker jembiba mapang Khodr-i ashiba agi, iba ki ya hopta ka tejakdanga maka liasü. Ajisüaka tang iba ki ya ajunga raksaogo aser Israel-i ashiba agi, Hezbollah puri iba kidang sen rezünga yua liasü.

Hezbollah den sendaktepa aliba Al-Manar TV-i Bodhbarnü ashiba agi, Israel-i central Beirut amakba mapang par telok political programme indang director den pa kinungtsü tepsetogo.

Channel-isa, par chirnur aser semchirtem yirur mozükidangi anir oa liasü, ta metetdaksü.

Israel military-i ashiba agi, parnoki ali ajanga southern Lebanon amak tenzükogo aser Zahrani ayong anasa aser Tyre tesem nung jila pezü nung alirtem dang tangsa dang linük north leni aotsü tetuyuba agütsüogo.

Lebanon indang NNA-isa, Tyre aser iba temeket nung aliba Burj Shemali tesem anepdang züngia amakba metetdaksüogo.

Israel-i Lebanon kübok Bekaa Valley nung Sahmar jila

amakba mapang nisung pezü tepseta liasü.


Kasa mapang nung Sidon yimti nunga Israel-i nisung ana tepsetogo aser ka yiruja liasü, ta NNA-i metetdaksü. Asürtem rongnung kabo paramedic ka liasü, ta Health Ministry-i ashi.

Agency-i ashiba agi, Israel-i anüng ajanga Mongolbarnü Ras al-Ain kiyong nung nisung aliba ki ka amakba sülen nisung pezü tepset aser nisung tenet yiruja liasü.

March 2 nü nungi tenzüka Israel-i Lebanon kübok tesem balala amak tenzükba sülen tanur 111 densema nisung 912 tepsetogo aser nisung 2,200 dak tema yirutsüogo, ta Lebanese Health Ministry-i metetdaksüogo.

Kasa mapang nung nisung million ka dak tema pei talidak ki toktsür aotsüsa kümogo. United Nations-i Mongolbarnü sangdong ka ajanga, Israel-i nisung aliba ki aser civilian infrastructure tem amakba ya rara nung aibelen ka aser international humanitarian temzüng ozüng anema lir ta t e k ü m d a n g t s ü metetdaksüogo.

Cummins 2026 IPL tetenzüklen asaya kar masayatetsü



Metsüremi/March 18, 2026 (Agencies): Australia nunger pacer aser Sun Risers Hyderabad (SRH) captain Pat Cummins yiruba ajanga 2026 Indian Premier League (IPL) tetenzüklen asayar kar nung masayatetsü, ta franchise-i Bodhbarnü jangjatsüogo.

Club sangdong ajangsa Cummins' masayaba mapang par team Ishan Kishan lenisüba nung asayatsü, ta metetdaksü. Iba ya Kishan asoshi khuret tasen ka asütsü, shibai taoba

küm Jharkhand team Syed Mushtaq Ali Trophy nung takok dangi aniogo. Kasa mapang nung SRH-i vice-captain mapa ya opener Abhishek Sharma nem agütsüogo.

Cummins ya teberem yiruba tang tashi taneptsü monguteti lir, koba ajanga pa T20 World Cup nunga masayatetsüsa aküm.

Right-arm Australia nunger pacer ya Australia ODI aser Test team captain lir. Pa nem SRH captain mapa ya 2024 IPL

metenzük tsüngda agütsü. Pa lenisüba nung SHR pur Qualifier 2 atong aser taruba season trokbuba nung tembanga liasü.

Taoba season ana nung SRH puri batting record aika yangluogo. Team nung Travis Head, Abhishek Sharma, Ishan Kishan, Heinrich Klaasen aser Liam Livingstone nunger amala batter tajungtem lir asünung parnoki temaba jenjang nung asayaba repringtsü atema fan tem imlatepa alitsü. Maneni opener Travis-Head aser Abhishek nati otsü tasen yanglutsüsa asayatetsü imla atar.

IPL 2026 atema Sun

Risers Hyderabad squad:

Abhishek Sharma, Aniket Verma, Brydon Carse, Eshan Malinga, Harsh Dubey, Harshal Patel, Heinrich Klaasen, Ishan Kishan, Jaydev Unadkat, Kamindu Mendis, Nitish Kumar Reddy, Pat Cummins, Smaran Ravichandaran, Travis Head, Zeeshan Ansari, Salil Arora (Rs 1.50 crore), Shivang Kumar (Rs 30 lakh), Liam Livingstone (Rs 13 crore), Jack Edwards (Rs 3 crore), Amit Kumar (Rs 30 lakh), Krains Fuletra (Rs 30 lakh), Sakib Hussain (Rs 30 lakh), Onkar Tarmale (Rs 30 lakh), Praful Hinge (Rs 30 lakh), aser Shivam Mavi (Rs 75 lakh).

BILEMDANGANG

"Merangdangertemi kishi lapokyonga oteter."